

四庫全書

集部

欽定四庫全書

集部

唐百家詩選卷十五
至

詳校官中書臣張經田

助教臣常循履勘

總校官原任中允臣王燕緒

校對官中書臣溫汝适

謄錄監生臣李傳燮

謄錄監生臣趙鳴皋

欽定四庫全書

唐百家詩選卷十五

宋 王安石 編

盧仝十四首

走筆謝孟諫議寄新茶

日高丈五睡正濃
軍將打門驚周公
口云諫議送書信
白絹斜封三道印
開緘宛見諫議面
手閱月團三百片
聞道新年入山裏
蟄蟲驚動春風起
天子須嘗陽羨茶

百草不敢先開花仁風暗結珠琲瑠先春抽出黃金牙
摘鮮焙芳旋封裹至精至好且不奢至尊之餘合王公
何事便到山人家柴門反闕無俗客紗帽籠頭自煎喫
碧雲引風吹不斷白花浮光凝椀面一椀喉吻潤兩椀
破孤悶三椀搜枯腸惟有文字五千卷四椀發輕汗平
生不平事盡向毛孔散五椀肌膚清六椀通仙靈七椀
喫不得也唯覺兩腋習習清風生蓬萊山在何處玉川
子乘此清風欲歸去山上羣仙司下土地位清高隔風

雨安得知百萬億蒼生命墮在顛崖受辛苦便為諫議
問蒼生到頭合得蘇息否

憶金鵝沈山人

君愛煉藥藥欲成我愛煉骨骨已清試自比校得仙者
也應合得天上行天門九重高崔嵬青空鑿出黃金堆
夜叉守門晝不啓半夜醺祭半夜開夜叉喜歡動關鎖
鑊聲掣地生風雷地上禽獸重血食性命血化飛黃埃
太上道君蓮花臺九門隔濶安在哉嗚呼沈君大藥成

兼須巧會鬼物情無貪長生喪厥生

揚州送伯齡

伯齡不厭山山不養伯齡松顛有樵墮石上無禾生不
忍六尺軀遂作東南行諸侯盡食肉壯氣吞八紘不啣
溜銑漢何由通姓名夸齊餓死日武王稱聖明節義士
枉死何異鴻毛輕努力事干謁我心終不平

歎昨日

天下薄夫苦耽酒玉川先生也耽酒薄夫有錢恣張樂

先生無錢養恬漠有錢無錢俱可憐百年驟過如流川
平生心事消散盡天上白日悠悠懸上帝版版主何物
日車刼刼西向沒自古聖賢無奈何道行不得皆白骨
白骨化土鬼入泉生人莫負平生年何時出得禁酒國
滿瓮釀酒曝背眠

月蝕詩

新天子即位五年歲次庚寅斗柄揲子律調黃鍾森森
萬木夜殭立寒氣聶肩頑無風爛銀盤從海底出出來

照我草屋東天色紺滑凝不流水光交貫寒瞳矐初疑
白蓮花浮出龍王宮八月十五夜比並不可雙此時怪
事發有物吞食來輪如壯士斧斫壞桂似雪山風拉摧
百鍊鏡照見膽平地埋寒灰火龍珠飛出腦却入蚌蛤
胎摧環破壁眼看盡當天一搭如煤炲磨蹤滅跡須臾
間便似萬古不可開不料至神物有此大狼狽星如撒
沙出爭頭事光大奴婢炷暗燈拵烏感葵如玳瑁今夜吐
涎如長虹孔隙千道射戶外玉川子涕泗下中庭獨自

行念此日月者太陰太陽精皇天要識物日月乃化生
走天汲汲勞四體與天作眼行光明此眼不自保天公
行道何由行吾見陰陽家有說望日蝕月月光滅朔月
掩日日光缺兩眼不相攻此說吾不容又孔子師老子
云五色令人目盲吾恐天似人好色即喪明幸且非春
時萬物不嬌榮青山破瓦色綠水永崢嶸花枯無女豔
鳥死沉歌聲頑冬何所好偏使一目盲傳聞古老說蝕
月蝦蟇精徑圓千里入汝腹汝此癡骸阿誰生可從海

窟來便解緣青冥恐是睚眦間措塞所化成黃帝有二
目帝舜重瞳明二帝懸四目四海生光輝吾不遇二帝
滉漭不可知何故瞳子上坐受蟲豸欺長嗟白兔搗靈
藥恰似有意防姦非藥成滿臼不中度委任白兔夫何
為憶昔堯為天十日燒九州金鑠水銀流玉燭音炒丹砂
焦六合烘為窯音遙堯心增百憂帝見堯心憂勃然發怒
決洪流立擬沃殺九日妖天高日走沃不及但見萬國
赤子鹹鹹生魚頭此時九御導九日爭持節幡麾幢旒

駕車六九五十四頭蛟螭虬掣電九火斬汝若蝕開齧
齧輪御轡執索相爬鉤推蕩轟訇入汝喉紅鱗燄鳥燒
口快翎鬣倒側聲駭鄒撐腸挂肚礪傀如山丘自可飽
死更不偷不獨填飢坑亦解堯心憂恨汝時當食藏頭
揪腦不肯食不當食張脣哆嘴食不休食天之眼養逆
命安得上帝請汝劉嗚呼人養虎被虎齧天媚墓被墓
瞎乃知恩非類一一自作孽吾見患眼人必索良工訣
想天不異人愛眼固應一安得嫦娥氏來習扁鵲術手

操舂喉戈去此晴上物其初猶朦朧既久如抹漆但恐
功業成便此不吐出玉川子又涕泗下心禱再拜額跼
砂土中地上蟣虱臣全告懇帝天皇臣心有錢一寸可
剗妖菴癡腸上天不為臣立梯磴臣血肉身無由飛上
天揚天光封詞付與小心風颭排閭闔入紫宮密通玉
几前擘坼奏上臣全頑愚冒敢死橫干天代天謀東方
蒼龍角揅戟尾捍風當心開明堂統領三百六十鱗蟲
坐理東方宮月蝕不救援安用東方龍南方火鳥赤潑

血項長尾短飛跋躡頭戴井冠高達枿月蝕鳥宮十三

度鳥為居停主人不覺察貪向何人家行赤口毒舌毒

蟲頭上喫却月不啄殺虛眈鬼眼赤突音決窩鳥罪不可

雪西方攫虎立踦踦音几斧為牙鑿為齒偷犧牲食封豕

大蟄一嚙固當軟美見似不見是何道理爪牙根天不

念天天若準擬錯準擬北方寒龜被虵縛藏頭入殼如

入獄虵筋束緊束破殼寒龜夏鼃一種味且當臠其肉

一底板沒信處唯堪支床脚不堪鑽灼與天下卜歲星

主福德官爵奉董秦忍使黔婁生覆尸無衣巾天失眼
不弔歲星胡其仁焚惑矍鑠翁執法大不中月明無罪
過不糾蝕月蟲年年十月朝太微支盧謫罰何災凶土
星與土性相背反養福德生禍害到人頭上死破敗今
夜月蝕安可會太白真將軍怒激鋒鏑生恒州陣斬鄴
定進項骨脆甚春蔓菁天唯兩眼失一眼將軍何處行
天兵辰星任廷尉天律自主持人命在盆底固應樂見
天盲時天若不肯信試喚臯陶鬼一問一如今日三台

文昌宮作上天紀網環天二十八宿磊磊尚書郎整頓
排班行劒握他人將一四太陽側一四天市傍操斧代
大匠兩手不怕傷弧矢引滿反射人天狼呀啄明煌煌
癡牛與騃女不肯勤農桑徒勞含淫思旦夕遙相望蚩
尤簸旗弄旬朔始搥天鼓鳴璫琅枉矢能虵行眊目森
森張天狗下舐地血流何滂滂譎險萬萬黨架構何可
當眯目疊成就害我光明王請留北斗一星相北極指
麾萬國懸中央此外盡掃除堆積如山岡贖我父母光

欽定四庫全書

唐百家詩選
卷十五

七

當時常星沒殞雨如迸漿似天會事發叱喝誅奸強何
故中道廢自遺今日殃善善又惡惡郭公所以亡願天
神聖心無信他人忠玉州子詞訖風色緊格格近月黑
暗邊有似動劒戟須臾癡螫精兩吻自決拆初露半箇
壁漸吐滿輪魄衆星盡原赦一幕獨誅磔腹肚忽脫落
依舊掛穹碧光彩未蘇來慘澹一片白奈何萬里光受
此吞吐厄再得見天眼感荷天地力或問玉川子孔子
修春秋二百四十年月蝕盡不收今子咄咄詞頗合孔

意不玉川子笑答或請聽逗遛孔子父母魯諱魯不諱
周書外書大惡故月蝕不見收子命唐天口食唐土唐
禮過三唐樂過五小猶不說大不可數災沴無有大小
瘡安引衰周研數可否日分晝月分夜辨寒暑一主刑
一主德政乃舉孰為人面上一目偏可去願天完兩目
照下萬方土萬古更不瞽萬萬古更不瞽照萬古

有所思

當時我醉美人家美人顏色嬌如花今日美人棄我去

青樓珠箔天之涯
娟娟姮娥月三五
盈又缺翠眉蟬鬢
生別離一望不見
心斷絕心斷絕幾
千里夢中醉卧巫
山雲覺來淚滴湘
江水湘江兩岸花
木深美人不見愁
人心含愁更奏綠
綺琴調高絃絕無
知音美人兮美人
不知為暮雨今為
朝雲相思一夜梅
花發忽到牕前疑
是君

樓上女兒曲

誰家女兒樓上頭
指麾婢子掛簾鉤
林花撩亂心之愁

卷却羅袖彈箜篌
箜篌歷亂五六絃
羅袖掩面啼向天
相思向天情不斷
落花紛紛心欲穿
心欲穿憑欄干相
憶柳條綠相思錦
帳寒直緣感君恩
愛一回顧使我雙
淚長珊珊我有嬌
靨待君笑我有嬌
蛾待君掃
花爛漫君不來及
至君來花已老
心腸寸斷誰得知
玉階暮
歷生青草

新月

仙宮雲箔卷露出
玉簾鉤清光無所
贈相憶鳳凰樓

悲新年

新年何事最堪悲
病客遙聞百舌兒
太歲只遊桃李迳
春風肯管歲寒枝

訪含曦上人

三入寺曦未來
轆轤無繩井百尺
渴心歸去生塵埃

寄崔柳州

使者立取書疊紙
生百憂使君若不信
他時看白頭三百
六十州剋情唯柳州
柳州蠻天末鄙夫
蒿之幽花落

隴水頭各自東西流
凜凜長相逐
為謝波上鷗

蕭二十三赴歙州婚期

僕客揚州早春寄一絕

淮上客情殊冷落
蠻方春早客何如
相思莫道無來使
回鴈峯前好寄書

出山作

出山忘掩山門路
釣竿插在枯桑樹
當時只有烏窺窬
更亦無人得知處
家僮若失釣魚竿
定是猿猴把將去

于鵠三首

題鄰居

僻巷鄰家少茅簷喜並居蒸梨常共竈澆薤亦同渠傳
晨朝尋藥分燈夜讀書雖然在城市還得似樵漁

過凌霄洞天謁張先生祠

戢戢亂峯裏一峯獨凌天下看如尖高上有十里泉志
人愛幽深一住五十年懸牘到其上乘牛耕藥田衣食
不下求乃是雲中仙山僧獨知處相引衝碧烟斷崖畫
昏黑槎枿橫隻椽面壁攀石稜養力方敢前累歇日已

沒始到茅堂邊見客不問誰禮質無周旋醉卧枕歌樹
寒坐展青氍折松掃藜牀秋果顏色鮮鍊蜜敲石炭洗
澡乘瀑泉白犬舐客衣驚走聞腥膻乃知軒冕徒寧比
雲壑眠

寄盧僊員外秋衣詞

寄遠空以心心誠亦難知篋中有秋帛裁作遠客衣縫
製雖女功尺度手自持容貌常目中長短不復疑斜縫
密且堅遊客多塵縑意欲都無言澣濯耐歲時殷勤託

行人傳語慎勿遺別來已年老亦聞鬢成絲縱然更相逢握手唯是悲所寄莫復棄願見長相思

朱餘慶一首

題薔薇花

四面垂條密浮陰入夏清綠攢傷手刺紅墮斷腸英粉著蜂須膩光凝蝶翅明雨中看亦好況復值初晴

張祐十三首

字永吉以處士居蘇州今
孤楚嘗薦其詩於朝不報

江南雜題

積潦池新漲，頽垣趾舊高。怒蛙橫飽腹，鬪雀墮輕毛。碧
瘦三稜草，紅鮮百葉桃。幽棲日無事，痛飲讀離騷。

賦得福州白竹扇子

探得輕字

金泥小扇謾多情，未勝南工巧織成。藤纓雪光纏柄滑，
篾鋪銀薄露花輕。清風坐向羅衫起，明月看從玉手生。
猶賴早時君不棄，每憐初作合歡名。

哭京兆龐尹

揚子津頭昔共迷，一為京兆隔雲泥。故人昨日同時弔，

舊馬今朝別處嘶向壁愁眉無復畫扶床稚齒已能啼
也知世路名堪貴誰信莊周論物齊

入關

都城連百二雄險此回環地勢遙尊嶽河流側讓關秦
皇曾虎視漢祖亦龍顏何事梟兇輩干戈自不閒

潤州楊別駕宅送蔣侍御收兵歸揚州

冷氣清金虎兵威壯鐵冠揚旌川色暗吹角水風寒人
對輜輶醉花垂睥睨殘羹歸丞相閣空望舊門闌

觀泗州李常侍打毬

日出樹烟紅
開場畫鼓雄
驟騎鞍上月
輕撥鎗前風
斗轉時乘勢
旁捎乍迸空
等來低背手
爭得旋分驥
遠射門斜入
深排馬迥通
遙知三殿下
長恨出征東

寄遷客

萬里南遷客
辛勤嶺路遙
溪行防水弩
野店避山魃
瘴海須求藥
貪泉莫舉瓢
但能堅志義
白日甚昭昭

閒居

僻巷新苔徧空庭弱柳垂井欄防稚子盆水試鵝兒喜
客加籩食邀僧長路碁未能拋世事除此更何為

題金山寺

一宿金山頂微茫水國分僧歸夜船月龍出曉堂雲樹
影中流見鍾聲兩岸聞因悲在朝市終日醉醺醺

題惠山寺

舊宅人何在空門客自過泉聲到池盡山色上樓多小
洞穿斜竹重欄夾瘦莎殷勤又城市雲水暮鍾和

送楊秀才遊雲南

鄂渚逢遊客瞿唐上去船江連萬里海峽入一條天鳥
影沉沙日猿聲隔樹烟新詩北來便為草寄巴牋

薔薇花

曉風抹破燕支顰夜雨催成蜀錦機當晝開時正明媚
故鄉疑是買臣歸

洛中感寓

擾擾都城曉四開不關名利也塵埃千門甲第身遙入

萬里銘旌死後來
洛水暮天橫莽蒼
邱山秋日路崔嵬
須知此事堪為鏡
莫遣黃金漫作堆

曹唐二首

暮春戲贈吳端公

年少英雄好丈夫
大家望拜漢金吾
閒眠曉日聽鶗鴂
笑倚春風仗轆轤
深院吹笙徒漢婢
靜街調馬任奚奴
牡丹花外簾鉤下
獨凭紅肌捋虎鬚

和周侍御買劍

將軍溢價買吳鉤要與中原靜
寇讐試掛牕前驚電轉
略拋床上怕泉流青天露拔雲霓泣黑地潛擎鬼魅愁
見說夜深星斗畔等閒期尅月支頭

賈島二十三首

字閻仙為倉曹參軍會昌二年辛

寄遠

別腸多鬱紆豈能肥肌膚始知相結密不及相結疎疎
別恨應少密離恨難祛門前南流水中有北飛魚魚飛
向北海可以寄遠書不惜寄書遠故人今在無況此數

尺身阻彼萬里途自非日月光難以知子軀

和劉涵

京官始云滿野人依舊開閉扉一畝居中有古風還市
井日已午幽牕夢南山喬木覆北齋有鳥鳴其間前日
遠岳僧來時與開闢新題驚我瘦窺鏡見醜顏陶情昔
自澹此意復羣攀

荅王參

寸晷不相待四時互如競客思先覺秋蟲聲各知暝霜

松積舊翠露月團新鏡詩負屬景同琴孤坐堂聽相期
黃菊節別約桃花徑每把式微篇臨風一長咏

延康吟

寄居延壽里為與延康鄰不愛延康里愛此里中人人
非十年故人非九族親人有不朽語得之烟山春

戲贈友人

一日不作詩心源如廢井筆硯無轆轤吟詠作縈綆朝
來重汲引依舊得清冷書贈同懷人詞中多苦辛

哭栢巖禪師

苔覆石床新師曾占幾春
寓留行道影焚却坐禪身
塔院關松雪經房鎖隙塵
自嫌雙淚下不是解空人

山中道士

頭髮梳千下休糧帶瘦容
餐雞成大鶴種子作高松
白石通宵煮寒泉盡日春
不曾離隱處那得世人逢

哭孟郊

身死聲名在多應萬古傳
寡妻無子息破宅帶林泉
塚

近登山道詩隨過海船故人相弔後斜日下寒天

南池

蕭條微雨後荒岸抱清源入舫山侵塞分泉稻接村秋
聲依樹色月影在蒲根淹泊方難遂他宵關夢魂

寄龍池寺貞空二上人

受命終南住俱妨去石橋林中秋信絕峰頂夜禪遙寒
草烟藏虎高松月照鵬霜天期到寺寺置即前朝

訪李甘原居

原西居處靜門對曲江開石縫銜枯草查根漬古苔翠
微泉夜落紫閣烏時來仍憶尋淇岸同行採蕨回

題李疑幽居

閒居少鄰並草徑入荒園烏宿池中樹僧敲月下門過
橋分野色移石動雲根暫去還來此幽期不負言

百門陂留辭從叔暮

幽鳥飛不遠我行千里間寒衝陂水路醉下菊花山有
恥長為客無成又入關何時臨澗柳吾黨共來攀

懷博陵故人

孤城易水頭不忘舊交遊
雪壓園碁屋風吹飲酒樓
路遙千里月人別十三秋
吟苦相思處天寒江急流

送友人遊蜀

萬岑深積翠路向此中難
欲暮多羈思因高莫遠看
阜家人寂寞揚子業凋殘
惟有岷江水悠悠帶月寒

再投李益常侍

何處初投刺當時赴尹京
淹留花柳變然諾肺腸傾
避

暑蟬移樹高眠鴈過城人家嵩岳色公府洛河聲聯句
逢秋盡嘗茶見月生新衣裁白紵思從曲江行

送惟一遊清涼寺

去有巡臺侶荒溪衆樹分瓶殘秦地水錫入晉山雲秋
月離喧見寒泉入定聞人間臨欲別旬日雨紛紛

酬張籍王建

疎林荒宅古坡前久住還因太守憐漸老更思深處隱
多閒數得上方眠鼠拋貧屋收田日鴈度寒江擬雪天

身事龍鍾應是分水曹
芸閣枉來篇

方鏡

背如刀截機頭錦
面似升量澗底泉
銅雀臺南秋日得
照來照去已三年

渡桑乾

客舍并州已十霜
歸心日夜憶咸陽
無端更渡桑乾水
却望并州是故鄉

贈梁蒲秀才班竹拄杖

揀得林中最細枝結根石上長身遲莫嫌滴瀝紅斑少
恰是湘妃淚盡時

宿杜家亭子

牀頭枕是溪中石井底泉通竹下池宿客未眠過半夜
獨聞山雨到來時

三月晦日贈劉評事

三月正當三十日風光別我苦吟身共君今夜不須睡
未到曉鍾猶是春

趙嘏六首

會昌二年擢進士第終渭南尉

長安秋望

雲物淒涼拂曙流，漢家宮闕動高秋。
殘星幾點鴈橫塞，長笛一聲人倚樓。
紫豔半開籬菊靜，紅衣落盡渚蓮愁。
鱸魚正美不歸去，空戴南冠學楚囚。

長安月夜與友生話故山

宅邊秋水浸苔磯，日日持竿去不歸。
楊柳風多潮未落，蒹葭霜在鴈初飛。
重嘶匹馬吟紅葉，却聽疎鍾憶翠微。

今夜秦城滿樓月故人相見一沾衣

重寄盧中丞

賤子來還去何人伴使君放歌迎晚醉指路上高雲此
夜鴈初至空山雨獨聞別多頭欲白惆悵惜餘曛

汾上宴別

雲物如故鄉山川知異路年來未歸客馬上春色暮一
罇花下酒殘日水西樹不待絃管終搖鞭背花去

獻淮南李僕射

早年曾謁富人侯今日難甘失鵠羞新諾似山無力負
舊恩如水滿身流馬嘶紅葉蕭蕭晚日照長江濫濫秋
功德萬重知不惜一言拋得百生愁

曲江春望懷江南故人

杜若洲邊人未歸水寒烟暖想柴扉故園何處風吹柳
一鴈南來雪滿衣目極思隨原草徧浪高書到海門稀
此時愁望情多少萬里春流遶釣磯

欽定四庫全書

唐百家詩選
卷十五

五

唐百家詩選卷十五

欽定四庫全書

唐百家詩選卷十六

宋 王安石 編

許渾三十二首

大中末為
郢州刺史

凌歊臺

在當塗縣西
宋高祖築

宋祖高高樂未回三千歌舞宿層臺
湘潭雲盡暮山出巴蜀雪消春水來
行殿有基荒薺合寢園無主野棠開
百年便作萬年計畝畔古碑空綠苔

送蕭處士歸緱嶺別業

醉斜烏帽髮如絲
曾看仙人一局碁
賓館有魚為客久
鄉書無鴈到家遲
緱山住近吹笙廟
湘水行逢鼓瑟祠
今夜月明何處宿
九疑雲盡綠參差

贈蕭兵曹

廣陵隄上昔離居
帆轉瀟湘萬里餘
楚澤病時無鴈鳥
越鄉歸去有鱸魚
潮生水郭蒹葭響
雨過山城橘柚疎
聞說攜琴兼載酒
邑人爭識馬相如

凌歊臺送韋秀才

雲起高臺日未沉
數村殘照半崑陰
野蠶成繭桑柘盡
溪鳥引雛蒲稗深
帆勢依依投極浦
鍾聲杳杳隔前林
故山迢遞故人去
一夜月明千里心

送嶺南盧判官罷職歸華陰山居

曾到劉琨鴈塞空
十年書劒似飄蓬
東堂舊屈移山志
南國新留煮海功
還挂一帆青草上
更開三徑碧蓮中
關西舊友應相問
已許滄浪伴釣翁

登故洛陽城

禾黍離離半野蒿昔人城此豈知勞
水聲東去市朝變山勢北來宮殿高
鷗噪暮雲歸古堞鴈迷寒雨下空壕
可怜緱嶺登仙子猶自吹笙醉碧桃

懷舊居

兵書一篋老無功故國郊扉在夢中
藤蔓覆梨張谷暗草花侵菊庾園空
朱門跡忝登龍客白屋心期失馬翁
楚水吳山何處是北窗殘月照屏風

哭虞將軍

白首從軍未有名，近將孤劍到江城。
巴童戍久能番語，胡馬調多解漢行。
對雪夜窮黃石略，望雲秋計黑山程。
可憐身死家猶遠，汴水東流無哭聲。

晚自朝臺津至韋隱居郊園

秋來鳬鴈下方塘，繫馬朝臺步夕陽。
村逕繞山松葉滑，柴門臨水稻花香。
雲連海氣琴書潤，風帶潮聲枕簟涼。
西去磻溪猶萬里，可能垂白待文王。

嘗與故宋補闕秋夕遊練湖南亭今復登賞愴
然有感

西風渺渺月連天同醉蘭舟未十年鵬鳥賦成人已沒
嘉魚詩在世空傳榮枯盡寄浮雲外哀樂猶驚逝水前
日暮長隄更回首一聲鄰笛舊山川

灞上逢元九處士東歸

瘦馬頻嘶灞水寒灞南高處望長安何人更結王生轡
此客虛彈貢氏冠江上蟹螯沙渺渺塢中蝸殼雪漫漫

舊交已盡新知少却伴漁師把釣竿

經故丁補闕郊居

死酬知己道終全波暖孤冰且自堅鵬上承塵纔一日
鶴歸華表亦千年風吹藥蔓迷樵逕水暗蘆花失釣船
四尺孤墳何處是闔閭城外草連天

祇命南海至廬陵逢表兄軍倖奉使淮海別後
却寄

盧橘花香拂釣磯佳人猶舞越羅衣三洲水淺魚來少

五嶺山高鴈到稀客路晚依紅樹宿鄉關暗望白雲歸
交親不念征南吏昨夜風帆去似飛

送王總下第歸丹陽

秦橋心斷楚江湄繫馬秋風酒一卮汴水月明東下疾
練塘花發北枝遲青蘓定沒安貧處黃葉應催獻賦時
憑寄家書問回報舊居還有故人知

登尉陀樓

劉項持兵鹿未窮自乘黃屋島夸中南來作尉任戮力

北向稱臣陸賈功
簫鼓尚陳今世廟
旌旗猶鎮昔時宮
越人未必知虞舜
一奏薰絃萬古風

題崔處士山居

坐窮今古掩書堂
二頃湖田一半荒
荆樹有花兄弟樂
橘林無實子孫忙
龍歸曉洞雲猶濕
麝過春山草自香
向夜欲歸心萬里
故園松月更蒼蒼

酬綿竹于中丞使君見寄

故人書信越褒斜
新意雖多舊約賒
皆就一麾先去國

共謀三逕未還家
荆巫夜隔巴西月
鄢郢春連漢上花
半月離居猶悵望
可堪垂白各天涯

金陵懷古

玉樹歌殘王氣終
景陽兵合戍樓空
松楸遠近千官塚
禾黍高低六代宮
石鷺拂雲晴亦雨
江豚吹浪夜還風
英雄一去豪華盡
唯有青山似洛中

秋晚雲陽驛西亭蓮花池

心憶蓮塘秉燭遊
葉殘花敗尚維舟
煙開翠扇清風曉

水泛紅衣白露秋神女暫來雲易散仙娥初去月難留
空懷遠道無持贈醉倚西欄盡日愁

題衛將軍廟將軍名遼陽美人少習詩書學劍
二十七遊并汾間神堯皇帝始建義旗遼以勇
藝進備行列洎擒竇建德遼持挾槍劍前突後
翼太宗顧而奇之天下既定錄其功拜將軍宿
衛以母老病且乞歸侍殘年辭旨哀激詔許之
既而以孝敬睦閨門以然信居鄉里及卒邑人

懷其賢廟于荆溪之湄以平生弓甲懸東西廡
下歲時祠祭頗福其土焉文士王教撰碑辭實
詳備而國史闕書其人因題是詩于廟壁

武牢關下護龍旗挾槩彎弧馬上飛漢業未興王霸在
秦軍纔散魯連歸墳穿大澤埋金劒廟枕長溪挂鐵衣
欲奠忠魂何處問葦花楓葉雨霏霏

歲暮自廣江至新興往復中道題峽山寺四首
夜醉晨方醒孤吟恐失羣海鰭潮上見江鵠霧中聞未

陂梅先實終冬草自薰樹隨山崦合泉到石稜分虎跡
空林雨猿聲絕嶺雲蕭蕭異鄉鬢明日共絲琴

薄暮綠西峽停橈一訪僧鷺巢橫臥柳猿飲倒垂藤水
曲岫千疊雲重樹百層山嵐寒殿磬溪雨夜船燈灘漲
危槎沒泉衝怪石崩中臺一襟淚歲杪別良朋

密樹分蒼壁長溪抱碧岑海風聞鶴遠潭日見魚深松
蓋環清韻榕根架綠陰

南方大葉榕樹橫枝危者輒生根垂地如柱大

洞丁多

斲石蠻女伴淘金

端州斲石浚縣淘金為業

南浦驚春至西樓送

月沉江流不回嶺何處寄歸心

月在行人起千峰復萬峰海虛爭翡翠溪邏關芙蓉

南方

呼市為虛呼戎為邏新州有翡翠虛芙蓉邏

古木高生斛陰池滿種松

木斛花生

於他樹槎枿池沼多謂之水松

火探深洞驚香送遠潭龍

南方持火於乳洞中取驚

而食康州悅城縣有溫媪龍池隨來往舟船至人家或千里外皆以香火酒果送之

藍塢寒先燒

禾堂晚併春

種藍多在塢中先燒其地人以木槽春禾謂之禾堂

更投何處宿西

峽隔雲鍾

王居士

筇杖倚柴關，都城賣卜還。
雨中耕白水，雲外斲青山。
有藥身長健，無機性自閒。
即應生羽翼，華表在人間。

寄題商洛王隱居

近逢商洛客，知爾住南塘。
草閣平春水，柴門掩夕陽。
隨蜂收野蜜，尋麝採生香。
更憶前年醉，松花滿石牀。

別韋處士

南北斷蓬飛，別多相見稀。
更傷今日酒，未換昔年衣。
舊友幾人在，故鄉何處歸。
秦原向西路，雲晚雪霏霏。

將赴京師留題孫處士山居

草堂近西郭遙對敬亭開
枕膩海雲起簟涼山雨來
高歌懷地肺遠賦憶天台
應學相如志終須駟馬回

春日題韋曲野老村舍

背嶺枕南塘數家村
落長鶯啼幼婦嬾蠶出
小姑娘忙煙草近溝濕
風花臨路香自憐非楚
客春望亦心傷

題倪居士舊居

儒翁九十餘舊向北山居
生寄一壺酒死留千卷書
欄

摧新竹少池淺故蓮疎但有子孫在帶經還荷鋤

江上喜洛中親友繼至

戰馬昔紛紛風驚嵩少塵全家南渡遠舊友北來頻
罷酒松桂晚賦詩楊柳春誰言今夜月同是洛陽人

獻白尹

醉舞任生涯褐寬烏帽斜庾公先在郡疎傳早還家
林晚鳥爭樹園春蝶護花高吟應更逸嵩路舊煙霞

送從兄別駕歸蜀川從兄彥昭與桂陽令韋伯

達貞元中俱為千牛伯達官至王府長史長慶
中非罪受譴前年會赦復故秩詔未及而身已
沒從兄自蜀而南發旅櫬歸葬塗上既而西還
因成十韻贈別

聞與湘南令童年侍玉墀家留秦塞曲官謫瘴溪湄道
直姦臣屏寃深聖主知逝川東注疾需澤北來遲清漢
龍髯失蒼岑馬鬣移風悽聞笛處月慘罷琴時客路黃
公廟鄉關白帝祠已稱鸚鵡賦寧望鶴鴒詩遠道書難

達長亭酒莫持當憑蜀江水萬里寄相思

項斯十二首

字子遷江東人會昌四年擢進士第為潤州丹徒縣尉卒官

題令狐處士溪居

白髮已過半無心離此溪病嘗山藥遍貧起草堂低為
月窻從破因詩壁重泥近來常夜坐寂寞與僧齊

山友贈鮮花冠

塵汙出山髮慙君青鮮冠此身閒未得終日戴應難好
就松陰挂宜當枕石看會須尋道士簪去遶霜壇

蠻家

領得賣珠錢還歸銅柱邊
看兒調小象打鼓試新船
醉後眠神樹耕時語瘴煙
不逢寒便老相問莫知年

送華陰隱者

往往到城市得非徵藥錢
世人空識面弟子不知年
自說能醫死相期更學仙
近來移住處毛女舊峰前

欲別

花時人欲別每日醉櫻桃
買酒金錢盡彈箏玉指勞
歸

期無歲月客路有風濤
錦段裁衣贈騏驎落剪刀

留別張籍郎中

省中重拜別兼領寄人書
已念此行遠不應相問疎
子城西並宅御水北同渠
要取春前到乘閒候起居

寄流人

毒草不會枯長流客健無
霧開蠻市合船散海城孤
象跡頻經水龍涎遠閉珠
家人秦地老泣對日南圖

長安退將

塞外衝沙損眼明將來養病住秦京上高樓閣看星坐
著白衣裳把劍行常說老身思鬪將最悲無力制蕃營
翠眉紅臉和回鶻惆悵中原不用兵

遙裝夜

卷簾貧拋壁下床且鋪他處對燈光欲行千里從今夜
猶惜殘春發故鄉蚊蚋已生團扇急衣裳未了剪刀忙
誰知更有芙蓉浦南去令人愁思長

蒼梧雲氣

何年化作愁漠漠便難收數點山能遠平鋪水不流濕
連湘竹暮濃蓋舜墳秋亦有思鄉客看來盡白頭

送宮人入道

願隨仙女董雙成王母前頭作伴行初帶玉冠多悞拜
欲辭金殿別稱名將敲碧落新齋磬却進昭陽舊賜箏
旦暮焚香繞壇上步虛猶作按歌聲

晚春花

陰洞日光薄花開不及時當春無半樹經燒足空枝疎

與香風會細將泉影移此中人到少開盡幾人知

李頻十九首

睦州遂安人乾符初自尚書工部員外郎為建州刺史

秦原早望

一忝鄉書薦長安未得回年光逐渭水春色上秦臺
驚掠平蕪去人衝細雨來東風生故里又過幾花開

送孫明秀才往潘州謁韋卿

北鳥飛不到北人今去遊天涯浮瘴水嶺外問潘州
草木春冬茂猿猴日夜愁定知遷客淚只敢對君流

送友人之揚州

一別長安後晨征便信雞河聲入峽急地勢出關低綠
樹叢垓下青蕪濶楚西路長知不惡隨處好詩題

送人入蜀

天際蜀門開西看舉別盃何人不異禮上客自懷才花
間青林發煙和綠水來臨邛行樂處莫到白頭回

送德清喻明府

棹返雲溪雲仍參舊使君州傳多古跡縣記是誰文水

柵橫舟閉湖田立木分但如詩思苦為政即超羣

南遊湘漢寄友人

南去遠三京三湘五月行巴江雪水下楚澤火雲生向
野聊中飲乘涼探暮程離懷不可說已近峽猿聲

送鳳翔范書記

京西無暑氣節候似全秋大幕來相辟高人去自由山
川通蜀國日月近神州好共將軍話河蘭地未收

送邊將

防秋戎馬恐來奔
詔發將軍入鴈門
遙領短兵登隴首
獨橫長劒向河源
悠揚落日黃雲動
莽蒼陰風白草翻
若縱干戈更深入
應聞收得到崑崙

湘口送人

中流欲暮見湘煙
岸葦無窮接楚田
去鴈遠衝雲夢雪
離人獨上洞庭船
風波盡日緣原轉
星漢通宵向水連

回首羨君偏有我
故園歸醉又新年

一本云歸去及新年

太和公主還宮

天驕發使犯邊塵漢將推功遂奪親離亂應無初去貌
死生難有却回身禁花半老曾攀樹宮女多非舊識人
重上鳳樓追故事幾多愁思向青春

春日客舍言懷

未識東南此路安青春日月坐銷難如何別却故園後
五度花開五處看

吳門月夜與曹太尉話別

早晚更看吳苑月西齋長憶月當窻不知明夜誰家見

應照離人隔楚江

張司馬別業

庭前樹盡手中栽，先後花分幾番開。
巢鳥戀雛驚不起，野人思酒去還來。
自拋官與青山近，誰許身為白日催。
門外尋常行樂處，重重履迹在莓苔。

鄂州頭陀寺上方

高寺上方無不見，天涯客上思迢迢。
西江帆挂東風急，夏口城銜楚塞遙。
沙岸漁歸多濕網，桑林蠶後盡空條。

感時歎物尋僧話
惟向禪心得寂寥

將赴黔州先寄本府中丞

八月瞿塘倒底翻
孤舟上得已銷魂
幕中職罷猶趨府
闕下官成未謝恩
丹嶂聳空無過鳥
青林覆水有垂猿
感知肺腑終難說
從此辭歸便掃門

和友人下第北遊感懷

聖代為儒可致身
誰知又別五陵春
青門獨出空啼鳥
紫陌相逢盡醉人
江島去尋垂望遠
塞山來見舉頭頻

且須共漉邊城酒何必陶家有白綸

長安感懷

一第知何日全家待此身空將灞陵酒酌送向東人

送劉山人歸洞庭

却共孤雲去高眠最上峰半湖乘早月中路入疎鐘秋
盡蟲聲急夜深山雨重當時同隱者分得幾株松

送友人往塞北

朔北已秋風前程見磧鴻日西身獨去山轉路無窮樹

隔高關斷沙連大漠空
君看河外將早晚擬平戎

唐百家詩選卷十六

欽定四庫全書

唐百家詩選卷十七

宋 王安石 編

李遠五首

字求古大中中
為忠州刺史

贈寫御真李長史

玉坐煙銷硯水清
龍髯不動彩毫輕
乍分隆準山河秀
初點重瞳日月明
宮女卷簾皆暗認
侍臣開殿盡遙驚
六朝供奉應無敵
始覺僧繇浪得名

失鶴

秋風吹却九臯禽一片閒雲萬里心
碧落有情應悵望青天無路可追尋
初來白雪翎猶短欲去丹砂頂漸深
華表柱頭留語後更無消息到如今

送人入蜀

蜀客本多愁君今是勝遊
碧藏雲外樹紅壓驛邊樓
杜宇呼名語巴江學字流
不知煙雨夜何處夢刀州

聽話叢臺

有客新從趙地回，自言曾上古叢臺。
雲遮襄國天邊盡，樹遶漳河地裏來。
絃管變成山鳥哢，綺羅留作野花開。
金輿玉輦無蹤跡，風雨誰知長碧苔。

黃陵廟詞

黃陵廟前莎草春，黃陵女兒蒨裙新。
輕舟小楫唱歌去，水遠山長愁殺人。

雍陶二十五首

大 中 中 終
簡 州 刺 史

盧岳閒居十韻

擾擾走人寰，爭如占得閒。
防愁心付酒，求靜力登山。
見藥芳時採，逢花好處攀。
望雲開病眼，臨澗洗愁顏。
春色流巖下，秋聲碎竹間。
錦文苔點點，錢樣菊斑斑。
路遠朝無客，門深夜不關。
鶴飛高縹緲，鶯語巧綿蠻。
養拙甘沉默，忘懷絕險艱。
更憐雲外路，空去又空還。

蜀中戰後感事十韻

蜀國英靈地，山重水又回。
文章四子盛，道路五丁開。
詞客題橋去，忠臣叱馭來。
臥龍同駭浪，躍馬比浮埃。
已謂

無妖土那知有禍胎
蕃兵依漢柳蠻旆指江梅
戰後悲逢血燒餘恨見
灰空留犀獸怪無復酒
除災歲積萑弘怨春深
杜宇哀家貧移未得愁
上望鄉臺

送于中丞使北蕃

同用聲字

朔將引雙旌
山遥磧雪平
經年通國信
計日得蕃情
野次依泉宿
沙中望火行
遠鷗秋有力
寒馬夜無聲
看獵臨胡帳
思鄉見漢城

回鶻中有漢城

來春擁邊騎
新草滿歸程

自述

萬事誰能問一名猶未知貧富多累日閒過少年時燈
下和愁睡花前帶酒悲無媒常委命轉覺命堪疑

河陰新城

高城新築壓長川虎踞龍盤氣色全五里似雲根不動
一重如月暈初圓河流暗與溝池合山色遙將睥睨連
自有此來當汴口武牢何用鎖風煙

崔少卿池塘詠雙白鷺

雙鷺應憐水滿池風飄不動頂絲垂立當青草人先見

行傍白蓮魚未知一足獨拳寒雨裏數聲相叫早秋時
林塘得爾須增價況與詩家物色宜

哀蜀人為南蠻俘虜五章

初出成都聞哭聲

但見城池還漢將豈知佳麗屬蠻兵錦江南渡聞遙哭
盡是離家別國聲

過大渡河蠻使許之泣望鄉國

大渡河邊蠻亦愁漢人將渡盡回頭此中郵寄思鄉淚

南去應無水北流

出青溪關有遲留之意

欲出鄉關行步遲此生無復却回時
千冤萬恨何人見唯有空山鳥獸知

別雋州一時慟哭雲日為之變色

越雋城南無漢地傷心從此便為蠻
冤聲一慟悲風起雲暗青天日下山

入蠻界不許有悲泣之聲

雲南路出陷河西毒草長青瘴色低漸近蠻城誰敢哭
一時收淚羨猿啼

過舊宅看花

花即昔年手植

山桃野杏兩三栽樹樹繁花去後開今日主人相引看
誰知曾是客移來

和河南白尹西池北新葺水齋招賞十二韻

二室峰前水三川府右亭亂流深竹逕分遶小花汀池
角通泉脈堂心豁地形坐中寒瑟瑟床下細泠泠雨夜

思巫峽秋朝想洞庭千年孤鏡碧一片遠天青魚戲搖
紅尾鷗閒退白翎荷傾瀉珠露沙亂動金星藤架如紗
帳苔牆似錦屏龍門人少到仙棹自多停游憶高僧伴
吟招野客聽餘波不能惜便欲養浮萍

蜀中經蠻後友人馬又見寄

茜馬渡瀘水北來如鳥輕幾年期鳳闕一日破龜城此
地有征戰誰家無死生人悲還舊里鳥喜下空營弟姪
意初定交朋心尚驚自從經難後吟苦似猿聲

送契玄上人南遊

紅葉落湘川，楓明映水天。
尋鐘過楚寺，擁錫上瀧船。
病客思留藥，迷人待說禪。
南中多古跡，應訪虎溪泉。

和劉補闕秋園寓興六首

水木夕陰冷，池塘秋意多。
庭風吹故葉，堦露淨寒莎。
愁燕窺燈語，情人見月過。
砧聲聽已別，蟲響復相和。
閉門無事後，此地即山中。
但覺鳥聲異，不知人境同。
晚花開為雨，殘果落因風。
獨坐還吟酌，詩成酒已空。

自得家林趣常時在外稀對僧餐野食迎客著山衣關
雀翻簷散驚蟬出樹飛功成他日後何必五湖歸

秋色庭蕪上清朝見露華疎篴抽晚笋幽藥吐寒芽引
水新渠淨登臺小逕斜人來多愛此蕭爽似山家

禁掖朝回後林園勝賞時野人來辨藥庭鶴住看碁晚
日明丹棗朝霜潤紫梨還因重風景猶自有秋詩

聖代少封事閒居方屏喧漏寒雲外闕木落月中園山
鳥宿簷樹水螢流洞門無人見清景林下自開樽

送徐山人歸睦州舊隱

君在桐廬何處住
草堂應與戴家鄰
初歸山犬翻驚主
久別江鷗却避人
終日欲為相逐計
臨時空羨獨行身
秋風釣艇遙相憶
七里灘西片月新

天津橋春望

津橋春水浸紅霞
煙柳風絲拂岸斜
翠輦不來金殿閉
宮鶯銜出上陽花

寄永樂殷堯藩明府

古縣蕭條秋景晚昔年陶令亦如君
頭巾漉酒臨黃菊手板支頤向白雲
百里豈能容驥足九霄終自別雞羣
相思不恨書來少佳句多從闕下聞

塞上宿野寺

塞上蕃僧老天寒疾上關遠煙平似水
高樹暗如山去馬朝常急行人夜始閒
更深聽刁斗時到磬聲閒

章碣四首

唐末人

旅舍早起

跡暗心多感，神疲夢不遊。
驚舟同厭夜，獨樹對悲秋。
曉角和人戰，殘星入漢流。
門前早行子，敲鐙唱離憂。

焚書坑

竹帛煙銷帝業虛，關河空鏢祖龍居。
坑灰未冷山東亂，劉項原來不讀書。

春別

擲下離觴指亂山，趨程不待鳳笙殘。
花邊馬嚼金銜去，樓上人垂玉筍看。
柳陌雖然風裊裊，葱河猶自雪漫漫。

殷勤莫厭貂裘重恐犯三邊五月寒

送謝進士歸閩

百越風煙接巨鰲還鄉心壯不知勞雷霆入地建溪險
星斗逼人黎嶺高却擁木綿吟麗句便攀龍眼醉香醪
名場聲利喧喧在莫向林泉改鬢毛

施肩吾一首

字希聖
洪州人

效古興

金雀無舊釵絢綺無舊裾唯有一寸心長貯萬里夫南

軒夜蟲織已促北牖飛蛾遠殘燭祇言衆口鑠千金誰
信獨愁銷片玉不知歲晚歸不歸又將啼眼縫征衣

陳陶六首

武宣時人自
稱三教布衣

閒居雜興

一顧成周力有餘白雲閒釣五溪魚中原莫道無麟鳳
自是皇家結網疎

長壽

一作
愛

真人王子喬五松山月伴吹簫從他浮世悲

生死獨駕蒼麟入九霄

鄱陽秋夕

憶昔鄱陽旅遊日曾聽南家爭擣衣
今夜重聞舊砧杵當時還見鴈南飛

旅次銅山途中先寄溫州韓使君

亂山滄海曲中有橫陽道東馬過銅梁
苔華坐堪老鳩鳴高崖裂熊鬬深樹倒
絕壑無坤維重林失蒼昊躋攀寡儔侶
扶接念輿阜俛仰慄嵌空無因掇靈草
梯窮聞戍鼓魂續賴丘禱蔽豁天地歸
縈紆村落好悠悠思蔣

徑擾擾愧商皓馳想永嘉侯應傷此懷抱

題徐穉湖亭

伏龍山橫洲渚地人如白蘋自生死洪崖成道二千年
唯有徐君播青史

泉州刺桐花詠

猗猗小艷夾通衢晴日薰風笑越姝只是紅芳移不得
刺桐屏障滿中都

李群玉七首

字文山澧州人大中中宰相崔鉉
進其詩以處士除弘文館校書郎

經費拾遺所居呈封員外

雲臥竟不起，少微空隕光。
惟應孔北海，為立鄭公鄉。
舊館苔蘚合，幽齋松菊荒。
空餘書帶草，日日上堦長。

古鏡

明月何處來，朦朧在人境。
得非軒轅作，妙絕世莫並。
瑤匣開旭日，白電走孤影。
泓澄一尺天，徹底函霜景。
冰輝凜毛髮，使我肝膽冷。
忽驚行深幽，面落九秋井。
雲天入掌握，爽朗神魄靜。
不必負局仙，金沙發光炯。
陰沉畜靈

怪可與天地永恐為悲龍吟飛去在俄頃

傷思

八月白露濃芙蓉抱香死紅枯金粉墮寥落寒塘水西
風團葉下疊穀參差起不見棹歌人空垂綠房子

洞庭入澧江寄巴丘故人

四月桑半枝吳蠶初弄絲江行好風日燕舞輕波時去
事旋成夢來歡難預期唯憑東流水日夜寄相思

自澧浦東遊江表途出巴丘投員外從公虞

短翮後飛者前攀鸞鶴翔力微應萬里矯首空蒼蒼誰
昔探花源考槃西嶽陽高風動商洛綺皓無馨香一朝
下蒲輪清輝照巖廊孤醒立衆醉古道何由昌經術震
浮盪國風掃齊梁文襟卽玄圃筆下成琳琅霞水散吟
嘯松筠奉琴觴冰壺避皎潔武庫羞鋒鋌小子書代耕
束髮頗自強難哉水投石壯志空摧藏十年侶龜魚垂
髮在三湘巴歌掩白雪鮑肆埋蘭芳騷雅道未消何憂
名不彰饑寒束困厄默塞飛星霜百志一不成東波擲

年光塵生脫粟甑萬里違高堂中夜恨火來焚燒九回
腸平明梁山淚綠枕霑匡床依泊洞庭波木葉忽已黃
哀碁擣秋色曉月啼寒螢復此棹孤舟雲濤浩茫茫朱
門待媒賁短褐誰揄揚仰羨野陂鳬無心憂稻粱不如
天邊鴈南北皆成行男兒白日閒變化未可量所希困
辱地剪拂成騰驤咋筆話肝肺詠茲枯魚章何由首西
路目斷白雲鄉

洞庭驛樓雪夜宴集奉贈前湘州張員外

昔與張湘州閒登岳陽樓目窮衡巫表興盡荆吳秋擲
筆落郢曲巴人不能酬是時簪裾會景物窮冥搜謬忝
玳筵秀得陪文苑遊幾篇雲楣上風雨沈銀鈎

盧溪道中

曉發潺湲亭夜泊潺湲水風篁拂石瀨琴聲九十里光
奔覺來眼寒落夢中耳曾向三峽行巴江亦如此

章孝標一首

太和中為山南東道
從事試大理評事

長安秋夜

田家無五行水旱卜蛙聲牛犢乘春放兒孫候暖耕池
塘煙未起桑柘雨初晴歲晚香醪熟村村自送迎

馬戴三首

博士

易水懷古

荆卿西去不復返易水東流無盡期落日蕭條薊城北
黃沙白草任風吹

送客南遊

擬卜何山隱高秋指岳陽葦乾雲夢色橘熟洞庭香疎

雨殘虹影回雲背
鳥行靈均如可問
一為哭清湘

寄襄陽王公子

君馬勒金羈
君家貯玉筍
白雲登峴首
碧樹醉銅鞮
澤廣荊州北
山多漢水西
鹿門知不隱
芳草自萋萋

劉得仁二首

題邵公院

無事門多掩
陰階竹掃苔
勁風吹雪聚
渴鳥啄冰開
樹向寒山得
人從瀑布來
終期天目老
擎錫逐雲回

悲老宮人

白髮宮娃不解悲滿頭猶自插花枝曾緣玉貌君王寵
准擬人看似舊時

高蟾三首

春

明月斷魂清藹藹平蕪歸思綠迢迢人生莫遣頭如雪
縱得春風亦不銷

灞陵亭

一條歸夢朱絃直一片離心白羽輕
明日灞陵新霽後馬頭煙樹綠相迎

偶作

丁當玉珮三更雨平帖金闥一覺雲
明日薄情何處去風流春水不知君

崔塗八首

字禮仙光啓四年登進士第

夕次洛陽道中

秋風吹故城城下獨吟行
高樹鳥已息古原人尚耕
流

年川暗度往事月空明不復嘆岐路馬前塵夜生

春夕旅懷

水流花謝兩無情送盡東風過楚城蝴蝶夢中家萬里
杜鵑枝上月三更故園書動經年絕華髮春唯兩鬢生
自是不歸歸便得五湖煙景有誰爭

上巳日永崇里言懷

未敢分明賞物華十年如見夢中花遊人過盡衡門掩
獨自憑欄到日斜

蜀城春望

天涯憔悴身一望一沾巾在處有芳草滿城無故人懷
材皆得路失計獨傷春青鏡不忍照鬢毛應更新

鸚鵡洲春眺

悵望春襟鬱未開重臨鸚鵡益堪哀曹瞞尚不能容物
黃祖何因解愛才幽島暖聞燕鴈去曉江晴覺蜀波來
誰人正得風濤便一點輕帆萬里回

感花


繡轆香韉夜不歸少年爭忍最紅枝東風一陣黃昏雨
又到繁華夢覺時

過陶徵君舊居

陶令曾居此弄琴遺世情田園三畝綠軒冕一銖輕衰
柳自無主白雲猶可耕不隨陵谷變應只有高名

孤鴈

幾行歸塞盡念爾獨何之暮雨相呼失寒塘欲下遲渚
雲低暗渡關月冷相隨未必逢矰繳孤飛自可疑



唐百家詩選卷十七